



Aromai a jere scuasit une ore che Spilot al spietave il Comissari Rocheton daûr da ostarie. Al cjaminave sù e jù, gnervôs, fermantsi ogni tant a cjalâ i brentiei metûts in rie, plens di aghe fin su l'ôr.

Fûr che un.

Di fat, l'ultin brentiel al jere plen a mieç e sul fîl de aghe si viodeve un cjapiel.

Cuissà che che al jere sucedût. Alc al veve ruvinât chel repeç che i vecjos a dopravin par sglonfâ il len, cussì che, une volte molade fûr la aghe, il brentiel al podeve jessi jemplât di vin cence nissune pôre.

— Fer Spilot! — La vôs fuarte dal Comissari Rocheton a veve spaurît il zovin.

— No stâ ruvinâ il lûc dal delit! Za tu âs cjaminât ator dai brentiei, salacor puartant vie cualchi olme!

— Che al scusi, Comissari. Ma chi je aghe par dut. Al è dificil par fin stâ impins!

Rocheton al cjalave il cjapiel sul fîl de aghe. Sbassant il voli, si jere ancje inacuart che in bande si viodevin tocs di len: ce che al restave di une cjadree sfracassade.

— Alore, Spilot. Il delit al è clâr come la lûs dal soreli. Usnot passade, un om al tornave a cjase trancuîl. Il sassin, platât par ben, al è saltât fûr di bot e i à rot la cjadree sul cjâf. No content, lu à butât dentri intal brentiel e lu à inneât, fasint dut chest slavanderi. Une volte muart, al à tirât fûr il cuarp e butât di cualchi bande, smenteant il cjapiel sul fîl de aghe.

Spilot al cjalave il Comissari, cirint di imagjinâsi intal cerviel la sene dal delit.

— Ma Comissari, — al veve po dopo scomençât. — Metinle cussì. Usnot passade, un om al tornave a cjase trancuîl. Capitât dongje de ostarie al è stât cjàpât di un colp di sêt. Jessint

che l'ambient al jere sierât e viodint i brentiei plens di aghe, al à doprât la cjadree par rimpinâsi e podê bevi. La cjadree si è rote e lui al è sbrissât dentri, fasint strucjâ mieze aghe. Po dopo, rivât a saltâ fûr, al è lât cjase dut imbombât, smenteantsi dal cjapiel.

Intant dongje di lôr al passave Tombul Barberosse che al cjacarave cun l'ostîr.

— ... E cussì o soi colât dentri. Cumò o cjapi sù il cjapiel e o doi la jemple di aghe, fin su l'ôr!

— Spilot... — Al veve dit Rocheton. — Eco, sberdeât il câs dal brentiel a mieç!

di Massim Furlan